

鶴水縣志卷之九

人物志

先哲 名臣 政事 武功 孝友
儒行 義行 流寓 仙釋

玉蘊山輝珠藏川媚物理且然况人杰乎故賢
詰篤生地以人傳其上焉者學術士功照耀今
古其次獨行烈女皆列史家至於寓賢方外亦
志地者所不廢蓋春秋之義善善欲長苟一行
之可稱亦得以次相附用是昭往邇來庶幾聞
風而興起焉志人物

先哲

唐

孔穎達衡水縣人八歲就學誦記日千餘言善屬

文通步歷大業初舉明經高第授河內郡博士

隋亂避地虎牢太宗平洛授文學館學士貞觀

初轉給事中時帝新卽位穎達數以忠言進帝

問孔子稱以能問於不能以多問於寡有若無

實若虛何謂也對曰此聖人教人意耳已雖能

仍就不能之人以資所未能已雖多仍就寡少

之人更資其多內有道外若無中雖實容若虛

非特匹夫君德亦然改其稱蒙以養正明夷以

蒞衆若其據尊極之位銜聰耀明恃才以肆則

上下不通君臣道乖自古滅亡莫不由此帝稱善後以太子右庶子兼國子司業與諸儒議歷及明堂事多從其說以論撰勞加散騎常侍爵爲子皇太子令穎達撰孝經章句因文以盡箴諷帝知數爭太子失賜黃金一斤絹百疋久之拜祭酒侍講東宮後太子稍不法穎達爭不已孔夫人曰太子旣長不宜數面折之對曰蒙君厚恩雖死不恨剗切愈至後致仕卒陪

贈太常卿謚曰憲初穎達受詔撰五經義訓凡百餘篇號義贊詔改爲正義云

蓋文達信譽人博涉前載春秋三家刺史竇

抗集諸生講論於是劉焯劉軌同孔穎達並以

耆儒開門受業焯依經辨難皆

諸儒意所未叩焯歎服抗焯高安所從學

焯曰若人岐嶷出自天然以多問寡則焯爲之

師抗口冰生於水而寒於水其謂此邪武德中

授國子助教爲秦王文學館直學士貞觀初擢

諫議大夫兼宏文館學士爲蜀王太傅王有罪

文達免官後拜崇賢館學士尋卒當時亦與十

八學士之列圖像於凌烟閣宗人文懿亦以文

學稱當時號二蓋

孔惠元忠之子穎達孫也自少力學克承家業對賓客寡言笑若有所思高宗時徵爲國子監司業與祖父三世相繼爲司業時人榮之

名臣

明

李遵義字宜甫生而聰慧嗜學博洽經史洪武庚午舉人丁丑成進士初授河南新鄭知縣時國家新造瘡痍者甫起諸所注措悉達體要唯務與民休息至持已獨尚廉介抑苞苴吏殊畏之

暇則巡行閭里訪詢民瘼其家之貧富丁之壯弱一見卽記憶無遺故定賦審徭咸稱不爽嘗有富民賄里書妄訴爲貧者遵義歷述其富狀以詰其僞乃自驚服至聽訟甫聞兩造詞卽判得實一言而決莫不服其明允會有囚法不當死部使者欲擬重辟輒與之抗辨聲色俱厲使者上章劾之落職爲民永樂初以循良徵起復除新鄭士民望塵迎拜懽若更生逾歲升紹興府同知大興水利民歌頌之二年擢山西按察司僉事備兵冀北諸部落相戒毋犯雲中尋遷

爲大理寺左寺正僅旬餘丁母憂家居久之大
臣交薦擢知河南府會營造宮闕郡發夫匠數
千人遵義躬自董役上深嘉之特賜金幣以示
勸復任月餘因勞致疾遂上疏乞休抵家未幾
卒歷官所至皆立祠祀之

趙應龍字舜臣別號石泉涇邑西科舉人壬戌授

山西沁水知縣英毅明達爲民興利除害邑有
村處深山中苦有虎不敢入城市公禱于神遣
人捕之至則生縛虎若有驅而赴之者縣治南
有淫祠愚民爲所惑公至亟毀像以祠改書院

聚諸生秀異者於中自是沁士益力於學而科
目益盛正德丁卯徵拜浙江道監察御史屢有
建白悉中體要時總憲者以逆瑾同省朋附爲
惡應龍獨列其姦狀劾黜之士大夫皆服其鯁
直旣而按遼東督將士勦平劇盜捷上武宗皇
帝甚善以爲文武兼資賜金幣殊渥辛未擢僉
憲分巡甘肅值歲艱經畫兵食邊圉賴以無警
所至關防嚴密執法不撓竟以剛方忤人爲持
憲者所論應龍亦有詞乃俱謝事歸嘉靖改元
撫按交議者舊宜起用適爲銓曹有隙者所阻

時論咸惜之崇祀鄉賢

楊宜字伯時別號菴生有奇資十歲卽能屬文十四遊鄉校嘉靖壬午以易經魁畿輔登癸未進士初授夏縣知縣丁母憂起復補濰縣多惠政築隄以防濰水之患城賴無虞去之日士民皆立祠祀之擢御史巡按湖廣持大體不事苛刻疑獄多所平反督學南畿品閱精確士林無不欽服先後罕有比倫其巡撫河南也適師尚詔倡亂鄭衛間遠近震駭宜設法擒勦之繼而總督浙直軍務平倭寇樹奇績陞南京兵部右

侍郎偶以浮議謝政歸杜門養重隱然有台輔之望以壽終崇祀鄉賢

傅希摯字承弼別號後川幼警敏不凡嘉靖己酉舉人登丙辰進士授安邑知縣節愛廉明民以父母戴之推戶部主事辛酉主計上谷羨金萬餘悉報部由郎中出守淮安節省調停一切報罷巡邏者患崇聞月下有鬼物私相戒曰亟避傅尚書已而希摯至咸驚異焉戊辰遷浙江兵備倭不敢窺江北辛未遷右叅政尹京兆撫山東擒巨寇青齊海岱之間藉以安枕丁丑撫陝

西會邊寇楊戩麻南搶掠藍田等處希摯指受
方畧一鼓蕩平陞戶部右侍郎值內艱回籍壬
午臺省推薦總督漕運甲申轉左侍郎總督倉
場升南京戶部尚書丙戌改南京兵部丁亥改
比部協理京營戎政戊子侍經筵賜麒麟服從
一品俸累疏乞休加太子少保致仕時賜馳驛
又遣中使賫寶鈔酒肴以示優寵丁酉卒於家
飭禮部議祭三壇工部議葬崇祀鄉賢

政事

唐

李桐客衡水縣人初仕隋爲門下錄事煬帝在江
都以四方日亂謀都丹陽召羣臣議左右希意
以江左且望幸若巡狩勒石紀功復禹舊跡顧
不偉然桐客獨曰吳會濕而狹不足奉萬乘練
三軍吳人力屈無以堪命且踰越險阻非社稷
福以訕毀幾得罪而免爲宇文化及脅將至黎
陽又陷入竇建德賊平授秦王府法曹參軍貞
觀初累爲通巴二州刺史治尙清平民呼爲慈

父

明

傅稟直希摯子也萬歷壬子科舉人初任唐山縣教諭立身端謹課士有法累遷戶部湖廣司郎中一切起存正雜本折錢糧無不纖悉精詳雖老於計曹者不能過也致仕以泉石自娛接物以禮飲人以和時有斗山之望

張俊英萬歷戊午舉人授潁山縣知縣精明強幹嫉惡如仇墾荒蕪復逃亡有不便於民者力爲除之既治三年訟獄衰息政通人和民有神明之號以卓績遷平涼府知府正身率屬行部風清秦中稱爲治行第一崇祀名宦尤博洽好古

所刻有人鏡經紀元彙考升菴史畧褚氏遺書
三墳書錢幣考迴文詩稿藏於家

國朝

石鑑字用晦號靜軒世居縣治之東大街少聰慧
好學能文康熙丁酉舉人雍正五年授山西榆
次知縣受事之初剔弊除好不事粉飾以教養
爲先務遇有不便於民者數力爭上官前必得
請乃已故榆次士庶謂鑑寬而能毅真父母我
也供軍需不以擾民以強直與上官左顧未有
以去鑑會公事出獄中囚醉毆相殺因以爲鑑

罪劾之去榆次人祖道者傾城郭自縣北門至
什貼五十里皆涕泣攀轅或遠送及壽陽太安
驛而後返初鑑罷官有父老負二瓜求見鑑曰
小人年七十餘矣未嘗至城市公真好官今且
去恐終不得見故奔走來此時以若耶老人送
劉寵者比之鑑去後復有以在任時侵稅錢者
責令追償欲以困鑑產遂破榆次人聞之爭醵
金千六百爲鑑贖自百年以來令榆次得民惠
愛不忘未有如鑑者鑑爲人誠朴居家孝友篤
交情晚年力學不倦課諸子孫必謹守禮法至

今以詩書世其家爲一邑望云

王紹文字宗洙邑之西關人也家故貧賤力學能文督學海寧陳公深相器重選拔貢生特疏薦之授四川成都縣知縣至則弊絕風清商民安堵川陝制府岳公家人嘗奉命歸修墳墓有所擾紹文力禁之飛稟軍門岳公爲之悚然手書優答上官以其能常署篆事所至有政聲一切供應陋弊獨力抗除之於是郡縣吏役咸望風畏避緣事解篆商賈罷市老幼號呼大吏溫語撫慰之事白復原職尋擢西安守激濁揚清風

規益峻屬令陳某海寧親侄也坐事力揭之其
無所徇縱類如此歷官所至境內肅然旋以疾
告休杜門謝客雖親故罕見其面人亦以此少
之

武功

國朝

張廣德由行伍隨靖邊大將軍平定準夷以軍功
議敘陞拔四川提標前營都司前任放縱失紀
律廣德到任加意整飭清理糧餉軍民感激累
遷高唐營遊擊舊例高唐餉米兵丁自出腳價

復不舉元 卷之九 九
搬運甚爲兵累廣德詳請上憲會議得如所請
嗣後高唐及東昌二營每年搬運餉米領給脚
價永爲定例平時簡閱訓練紀律森嚴年六十
四歲卒於高唐署誥封武德將軍再封昭武大
夫

孝友

明

張希儒增廣生父維賢病歿三日不食哀毀骨立
及葬築廬墓側捧土築墳朝焚香慟哭夜有黃
犬來伴三年然後歸有司榜其門

王三錫家貧甚父國斌疾篤思肉食三錫苦無錢
易乃自割股爲食以進父食之美病愈人無知
者其至性不可泯沒故特著之

宋民從父自化病歿哭泣不食及葬爲廬墓側朝
夕焚拜獨居三年母歿亦如之前後凡六年然
後歸有司請之當道榜其門曰孝行仍給粟帛
吳用洗歲貢生父母在堂日奉甘旨悉課讀所出
及卒一切喪具不累兄弟祖父遺業俱讓兄弟
均分及授徒四方携三弟同學知縣葉廷秀榜
其門曰是政第教諭雷景暘榜其門曰孝友足

法

國朝

李鳳鳴拔貢生十八歲而孤泣血三年未嘗見齒
奉母劉氏克盡孝道年凶減食以養遇兵變則
負母逃有司榜其門曰純孝可風贈以粟帛

羅星光庠生蚤孤母石氏苦節訓光成名光晨夕
侍養怡志無違督學榜其門曰孝備五秩光宿
慧力學工詩書法鐫篆並造古人之室當時士
林咸宗仰焉

劉炳字中朗廷簡子也居家孝友父病三月不愈

炳心力俱瘁衣不解帶目不交睫父病愈適邑人王公子來家父指謂之曰爾父可謂忠臣吾子可謂孝子矣且持己以正待人以和里中有兄弟相爭者聞炳至輒相感而化或以橫逆相加亦不校由廩貢生任鉅鹿縣訓導多方誘掖有累諸生之事力爲解救故在任無多日鹿之人士至今戴之

孫進孝景官村人母病禱神求愈割肉食母遂愈邑令聞而嘉之易其名曰進孝

朱惠秦家南田人家貧傭工養親每日候母起居

卷之九
奉甘旨冬月必溫衣衾以農家子能孝人益多
之

杜枝蕃少孤事母至孝竭力奉養母老抱病藥必
親煎及母沒泣血骨立撫養諸弟成丁授室康
熙二十九年鄉族保舉邑令黃公以孝友可風
榜其門

尚修東庄人庠生善事繼母友于兄弟析居後弟
殘廢不能度日復與同居終其身教諭應綺文
榜其門曰孝友維風

王永邑庠生天性孝友倫紀克敦乾隆四年有司

榜其門

戴州志

曹良字太和家故貧竭力以供甘旨常得父母歡心親歿四時祭掃必躬親之年八十餘未嘗少懈內外親黨人無間言公舉鄉飲耆賓有司榜其門曰寵錫虞庠

儒行

明

偉英庠生少年有所遇精於老子書後篤志內養年踰八旬形神不衰力於修身立命之學著有乾坤合道篇行世

蘇志正貢生專心典墳朝夕不倦於世若無所縈
有恬淡自適之致

胡一桐貢生任朝城縣訓導強志力學於五經子
史百家多所窺覽而文亦宏博有五芝草武水
吟詩稿

王淳貢生任永和縣教諭侃直方正教授生徒文
行交勉士梓仰爲楷模

國朝

高珽字孕嵐貢生德性冲和博涉經史負文望於
時邑令趙公璟雅敬重之累詣其門累舉鄉飲

大賓著有浣花閣詩集其醉八仙自嘲歌尤爲奇特

高紅雲字赤城貢生性豁達爲文豪放自喜常持公議礪風節有拔俗之概同時士林以此高之班永年字鶴洲貢生品行端方善屬文能詩工書法嘗舉優行再舉鄉飲大賓一時學者翕然宗之

康鶴年字介眉貢生賦性端嚴爲文立就適志林泉嘗以詩酒自娛任大事力能主持其才識又如此

義行

明

崔榮輕財重義成化三年歲大侵邑多餓殍榮憫之出粟五百餘石賑濟如是者再衆賴全活有司以聞旌表其門

李經家不甚裕性好施治西舊有漳橋正德間毀於流賊之亂經憫人病涉倡捐銀百餘兩合志重修遠近誦德不衰

徐廷性甘淡泊好行利濟鄉里咸以善人稱之嘉靖癸丑首倡義舉建石橋一切經費獨力任之

嘗捐助其不給苦勞二十五年至棄妻子拋家業而不顧繼之以死竟成大工廷之力居多當道嘉之請給冠帶榮身

趙儒好善樂施凡死喪無措者卽給之棺槨又買附郭田數畝作義塚二區至於周急助婚更無吝惜石橋工費慨輸五百金且躬爲料理務期工成當道嘉其尚義請給冠帶旌其門延爲鄉賓

賈從仁素豐於家性慈惠好施與嘗與徐廷輩董理橋工獨捐千金爲助有司嘉尚榜其門仍請

給冠帶榮身

李自立南謝章村人嘉靖癸丑年間邑建石橋自立有一贏賣鬻白金二十以倡首後相繼捐費不貲緣早卒不能終事然名不可泯故錄之

國朝

王賓廩膳生居鄉力學慷慨好施賑貧助喪瘞骨捨棺種種義行鄉里共推有司博採輿論申請督學榜其門

楊升河西北街人慷慨急公勤施好義所居坊水衝成渠車馬不便行人甚苦輸囊金四十首倡

修築士民推舉有司榜其門

張運化河西街人好善樂施有古仁人風時漳水橫溢歲大浸運化出粟賑濟全活飢民甚衆西關重修石橋捐貲成功本邑城隍廟暨八蜡廟年久傾圮倡捐銀二百兩合衆力修葺之一切恤孤拯困善蹟多端有司上聞旌表其門用舉者賓以光 國典

劉文光河西觀瀾街人業旅肆有山東玉城縣客遺金四十餘兩而去明晨回覓光還之事聞於官知縣張可舉榜其門曰好行其德且以花紅

鼓樂送諸大門之外

劉廷簡字帝臣西關集賢巷人性峻厲邑中有大事毅然以身任之里巷輕薄婦孺見之輒引避常善識人門人王紹文初執贄時卽指爲偉器紹文家素貧廷簡飲食教誨之後文爲西安太守具政蹟風裁卓然可紀者皆請業之益也先舉鄉飲介賓再舉鄉飲僎賓

恩賜八品儒官

鄭維寧字宗子城東北姚家下寨人也由歲貢任任縣訓導教授生徒多所成就二十四年任邑

水災委查戶口二十五年春出借倉米代辦賑
務任邑飢民賴以全活至今士民感其德焉

崔明全好善輕財給義學地十畝成全後學又給
義渡地五畝以濟往來知縣秦國楨榜其門曰
義行可風

尹斌監生康熙二十三年輸米五十石賑荒榜其
門曰尚義可風

張奇祿監生康熙二十三年輸米五十石賑荒中
丞于公榜其門曰尚義可風

李文金乾隆五年九月初二日夜行遇遺布候主

還之

康致祥嘗拾遺金七十金候原主還之知縣榜旌其門

孫若思雍正三年河水爲患修西門外隄以便人行又修文廟祭器學官榜其門

張光善樵採爲生嘗拾銀八兩逢人告知後遇銀主還之

張炳庠生好禮輕財鄉人何誠貧不能讀書炳捐資延師供給膏火

載州志

張興歲貢生家計素豐好行義舉自捐銀五十兩

在鉅鹿村倡修文昌祠

載州志

張璠監生好善樂施助喪助婚不一而足又捐銀

五十兩于鉅鹿村建石橋梁以濟往來

載州志

孫廷彩增廣生小侯村人內修孝行生母早喪事

二繼母並得其歡心以悅父志外設義館從遊

者衆不計束修鄉里重之

宋德善治家有法五世同居家人三十餘戶相親

愛從無乖戾

劉文耀治家嚴明內外整肅五世同居家人共五

十餘口自相親睦不聞詬訛之言里黨有紛爭

者文耀至輒歛跡畏避或一二言勸釋之其見重於人有如此

崔九成字四如例貢生石家庄人乾隆己卯秋大水堤決比戶啼飢九成出粟百餘石按數村戶口分給鄉人德之

宋純白貢生南田村人爲人孤介誠樸苦志讀書人目爲書癡行必讓路或遇婦女以扇自蔽越畔避之冬月製蘿蔔雜薑湯以飲市人邑令聞其名聘爲西席卽家事亦不干請

趙升連存心忠厚兄弟友愛村南堤有路爲南北

之衝屢被潯沱河水積滂經冬不涸行人病涉
升連率衆創修橋梁往來稱便

劉大年武生律村人焦枉修義渡大年施銀壹百
兩

鄭一枝張家庄人家南有地十畝施於鄉村以爲
放水之地迄今六十餘年數十村咸被其利遺
跡尚存

李煜以已田若干畝開溝洩水河北一帶賴以種
麥公舉爲耆老

康才久康家村人赤貧拾錢數十千次日錢主張

姓來覓盡與之謝以粟不受

韓文平韓家庄人現年六十五歲十五歲時上阜城路拾珠寶一匣值可七八百金晚至店中對衆人言有人來尋情願還之遲之數日阜城李成吳來覓盡與之成吳邀至家酬以數百金一無所受成吳不勝感激曰公眞義士也叩頭謝之

王天寵巨鹿村民性慈惠有族人夫婦携二稚子自山東歸貧且病夫婦相繼疾沒天寵出金葬埋之養其二十爲之成家至今宅基地產皆天

寵之力爲之也鄉村咸稱其善

王錫韓邑庠生方正仗義山東飢錫韓置一妾聞其有夫卽鳴之官還於母家不責身價邑令嘆曰韓生不患無子矣後果舉二子並爲邑諸生同懷弟錫魯慷慨好施雍正三年及六年水患歲飢常出粟資助鄉黨賴以舉火者百餘家有司屢榜其門

杜舜吾劉家庄人疎財仗義爲人排難解紛邑有訟或至公堂吏抱案稟曰杜舜吾可作解人令素聞舜吾長者常委息之有逋官銀者責不能

衡水縣志 卷之八
六
償舜吾出金五十兩土縣補之其好義類如此
子挺秀爲邑庠生孫謙益爲邑廩生居鄉多義
舉皆有祖父風里黨以此重之

韓天成韓家庄人習勤而好施鄭家河涯有義渡
天成出貲修之常私焚其券不下千金人不知
也今子孫衆多而才人以爲積善之慶云

流寓

宋

邵令進燕人也善騎射歷事藝祖以軍校尉老歸
范陽旣而徙中山轉衡漳而家焉生子德新讀

書為儒者早卒德新生子吉甫十一歲而孤性
簡寡言力貧養母以孝聞長益好學尤精於文
字聲律後徙共城教子雍為世大儒見宋史文
鑑

明

耿春山東滕縣人正統間以鄉薦授衡水縣學教
諭卒於官遂占籍於漳橋社子昇中景泰癸酉
科鄉試歷官知州迄今宗姓漸蕃昌焉

仙釋

明

赤脚盧不知其名亦不知爲何許人常蓬頭赤脚
雖隆冬衣不蔽體面色裕如口常言者造化而
已人或叩之亦只云造化造化如是者二十餘
年一日向衆辭曰去來去來此後不知何往人
皆疑其得道云

性澗山西代州宦家子也出家修行入五臺萬壽
寺投禪師行喻削髮爲僧成化間雲遊至本縣
寶雲寺寺僧洪寬見而敬之遂與之交居一寬
主清齋持戒三十餘年未嘗下榻一日令人修
塔建塔告衆曰吾將逝矣果坐化於禪床上

張三瘋不知何許人遊衡水寓趙氏家行步輕颺
臥不擇地時摺納釜中挾板二塊有異香人匿
之三瘋輒知其處明季亂軍至趙氏家人被虜
入營夜聞板音前導隨之得脫閱數十年有衛
士孫某赴真定路遇道人語之曰吾卽寓趙氏
家張三瘋也後不知所終

水縣志卷之十

列女

元

烈婦劉氏幼通古文孝經及小學書長適曹泰財
至正間紅巾賊陷河朔避兵聊城村賊奄至大
掠見劉氏在羣人中姿色特整持刀驅之行氏
曰吾婦人惟知從夫而已不從賊也賊欲移其
心盛陳金玉珠璣以錦繡衣披氏身氏裂碎之
賊強擁上馬墮地數四賊怒繩其項就馬上曳
之氏以手搥地頭觸石流血罵不絕賊知終不

能移遂遇害

明

烈婦李氏庠生高紹源妻正德六年流賊破城氏
被虜欲汙不從死之制府陸完上其事建坊旌
表

烈婦王氏年十九歲適魏永耀甫十月而永耀病
歿舅姑憫其少欲嫁之氏恐奪志伏屍痛哭殯
夫畢遂縊於櫬有司聞而賢之具銘旌牲醴往
祭焉

烈婦王氏趙天敏妻敏業高病歿於小灘鎮壬年

方二十七聞訃朝夕慟哭七日不食自縊死
司爲文以奠之仍榜其門

烈婦張氏郭希先妻希先病故時張年僅二十一
伏屍慟哭幾絕次日縊死柩側合葬焉

烈婦曹氏年十八適張和甫方三載而和甫病將
死囑曰汝尚少我死汝嫁可也氏泣曰與君慮
身後不若我死君前遂自縊者三家人每防救
之不得死及和甫死氏從後門密往投河家人
驚覺救之不及沉水死知縣蘭佩嘉其節弔之
以文仍給棺合葬

烈婦陶氏庠生崔邦召妻生一女方在襁褓而邦
召病陶躬侍湯藥知不起卽密約同死絕飲食
母姑百方勸慰之泣弗聽夫將絕潛入室閉門
自縊時氏方二十四歲有司題請旌表

張氏邑庠王德乾妻崇正末年時當喪亂德乾他
適遇賊刃之有人告其母曰爾子遇害尸在某
處其母曰吾兒孝子也焉遇害張氏哭往視之
得其屍歸葬焉時年十八有遺腹生男名業昭
張氏茹苦守節孝姑撫子艱辛萬狀年七十以

壽終

劉氏序班李多學妻廩膳生李樹藩母也少孀居
誓志不移躬績以教子年踰八旬髮齒不毀樹
藩能養志竭力茹苦向學卒爲一邑名士節孝
一門有司 題請旌表

孫氏郎中傅稟直孫監生傅爾鑑妻也少孀居屢
遭饑饉且兵亂甘貧守志矢死不二有司 題
請旌表

石氏庠生羅養性妻夫蚤喪守節撫孤有成督學

李氏庠生傅作賓妻蚤孀矢志教子成立輿論推
之

張氏庠生岳宗閔妻苦志守節課子成名子岳牧
康熙丙午舉人

烈婦蘇氏庠生李有謙妻武生斌母也謙病氏侍
湯藥不倦及卒氏號泣靈前自縊以殉有司

題請旌表

以上見
舊志

烈婦屈氏李旺山妻爲王明水逼污不從投河死
康熙五十九年有司 題請旌表

劉氏張景星妻年二十守節無子立侄爲嗣年六

十一而終乾隆三年有司 題請旌表

張氏李秉均妻年二十四孀居五十九卒有司

題請旌表

李氏劉漢奇妻年十九守志有遺腹生子桂枝課
讀成名年七十有四有司 題請旌表

李氏王秉衡妻年二十四守志孝事翁姑甚得歡
心親教孤焯爲生員年七十 題請旌表

王氏劉仁之妻二十一歲夫亡守節四十九年有
司 題請旌表

烈女馮雙姐明珠之妹有強暴逼犯之氏性節烈

不污羞忿繼死有司 題請旌表

烈婦王氏彭執中妻強暴刼從未遂氏羞忿投井
死乾隆二十二年有司 題請旌表

劉氏趙淮妻年二十四而寡守節六十餘年邑令
趙公環榜其門曰完節可嘉

劉氏舉人吳謀成繼妻年二十二而寡守節六十
六年督學林令旭榜其門曰操比松筠

賈氏監生侯可秀妻年二十四守節子允文與三
侄俱幼允文長食餼後分產氏命四分之允文

一三侄各取一人問之曰成夫志也氏稟性

淑慎步不輕出壽七十二而終學官旌榜其門

曰賦燕丸熊

李氏英盡仁妻夫亡氏年二十四遺腹生子撫養

成立守節三十三年

王氏李春輝妻夫亡氏年二十誓志不移躬績教
子八十歲而終有司榜其門

步氏韓之錫妻年二十五而寡守節至七十六歲
而卒督學陳世倌榜其門曰冰霜瑩潔

焦氏尚正紳妻夫亡氏年十九矢志自持善事翁
姑年八十而卒有司嘉其節榜其門曰松筠比

節

耿氏王汝書妻年二十而汝書卒氏慟絕復蘇遂
哀傷而死 杜氏王汝詩妻年二十四歲夫亡
喪葬如禮哀毀骨立數月而卒一門雙節督學
錢陳羣榜其門

張氏庠生趙朝重妻年二十八夫亡守節四十五
年

李氏趙國璧妻年二十六而夫亡守節三十餘年
王氏庠生李琇妻年二十八而寡守節三十七年
李氏常守志妻年二十四而夫亡守節七十而

卒

王氏李英士妻年二十三夫亡遺腹生子矢志苦守年五十七而卒

王氏趙可梅妻年二十二而孀長子貞甫三歲次子薰甫二月孝親撫孤不改其操年七十七以壽終

李氏拔貢傅保師之母年二十一夫亡守節撫孤保師由拔貢選樂亭縣教諭氏年九十一而終
渠氏副榜孫錫妻年二十五夫亡遺一子養親撫孤孝慈兼盡子某爲生員氏年八十而終

常氏王景福妻年二十三夫亡守節年八十一而終

何氏王克儉妻年二十二夫亡守節年九十一而終

王氏張更新妻年二十一夫亡守節年六十六而終

李氏常文炳妻年二十一夫亡撫遺腹子守志完節年五十五而終

王氏宋存良妻年二十五夫亡姑老小心侍養教子以義方年六十八而卒

倪氏王有盛母年二十一歲而寡立孤守節年七十而終

蓋氏王有盛妻年二十二夫亡守節年四十八

卒

趙氏渠大士妻年十九夫亡守節年三十歲病卒

潘氏王列卿妻年二十夫亡守節年六十而卒

常氏胡元中母年十九夫亡氏有至性粗知書史

父母憐之數諷氏他適氏輒僵臥不食者累日

後撫侄元中爲嗣卒成厥志年六十八而終

郝氏胡海成妻年十九歲夫亡欲以身殉強起立

節隣人罕見其面守節五十五年

宋氏李芳遠妻年二十九夫亡撫孤有成年六十
一而終

烈婦孫氏庠生張昭側室昭卒氏扶尸痛哭氣絕
者三尋引繩自縊遠近聞者莫不感傷

烈婦明氏張惠立妻立病甚語其妻曰病將革矣
我死任汝自行氏泣曰如君不諱妾不獨生也
夫既死方殮是夕氏自縊於柩側

司氏高萬層妻年二十二夫亡堅持清節以沒其
身年七十九而終

齊氏趙景行妻年十九夫亡家人哀其少寡諷其改適氏毀容自誓人不敢復言年七十七歲而終

吳氏張維讓妻年二十五夫亡飭躬持節年七十四而終

張氏郝義端妻夫亡氏年二十二居貧守節沒身不衰年六十一而終

郭氏庠生夏廷棟妻年二十四而寡養親撫孤守節四十年乾隆十九年卒

張氏庠生孫蘭潔妻年二十五而寡任力作勤針

齊養姑甘旨不缺於供撫侄爲夫後年五十七而卒

張氏張文重妻二十九歲夫亡守節六十一年卒
閔氏杜舜吾妻少寡生子挺秀甫七月舜吾卒氏
冰蘖自持撫孤成立爲邑名諸生年八十二歲
卒婦李氏以姑苦節孝養備至內外無間言至
今人稱道不衰

杜氏邵學思繼妻年二十一守節孝翁姑極盡孝
養夫前妻遺子克儉撫之如親生年五十三而
終

劉氏鄭金之妻年二十五夫亡子可益方晬撫之
比長課讀今爲生員氏年五十九而卒

吳氏劉得起妻年二十五夫亡無子有勸之改適
者氏面叱之貧甚操益堅年六十一而卒

李氏鄭文越妻年二十四夫亡撫孤事老親不憚
勞瘁年五十歲而卒

种氏李瑜妻年二十一而寡嚴氣正性動必以禮
守節六十二年卒

秦氏劉明義妻年二十二而寡賦性嚴介百折不
撓守節五十六年卒

李氏李國棟妻年二十四守志生二女無子冰霜
矢潔終身不渝年七十餘卒有司榜其門

李氏庠生李楨生妻年十九夫亡守節至八十一
而終有司榜其門曰節德純全

張氏李文妻年二十四而寡夫自幼得廢疾不能
動履氏日夜扶持無怨言上事翁姑孝養備至
督學給匾曰壺範可風

李氏者貢生高紅雲繼配也初紅雲娶張氏生一
女而卒繼娶李氏無子再娶楊氏生子二長世
經甫六齡次世綸方晬紅雲疾篤囑二氏曰吾

家世無失德當有後奈幼穉何倘令續吾志
目瞑矣二氏號慟以死自誓時李年二十有
楊年二十有九紅雲素貧以課徒爲業其死
苦無以葬二氏典衣沽釧喪葬如禮李氏族
人憐李無子且貧勸令改圖李氏輒嗚咽曰吾夫
遺孤在臨終受託而今負之何面目立人世乎
寧死無二勵節益堅長子足病不能行李氏
勤撫育無異已出次子初受書卽令從同邑舉
人邢文煊遊且令擇益友爲切磋地家計涼薄
雖判薦截髮所不辭比長值歲荒產且盡無力

就外傳二氏躬紡績佐膏火每夜至漏下數刻
無倦色二氏同歷艱辛者二十餘載乾隆初年
李氏卒嗣是楊氏持家益勤教子益篤次子世
綸乾隆庚午舉人辛巳進士長孫翼生員而楊
比年屆八表精神強健不少衰咸以爲貞節之

報云

張氏廩膳生鄭維藩妻年二十五而孀立侄爲嗣
守貞四十餘年七十三以壽終

于氏戴占之妻年二十一夫亡氏撫幼子備歷艱
辛年七十而卒

張氏劉有能妻年二十五而寡家貧姑老子幼以績紡爲生教養兼至現年五十有六

李氏陳超妻年二十四守節現年六十

王氏庠生馬全節妻年二十八守節現年七十三

盧氏楊美道妻年二十五夫故遺子芹秀甫六歲

夫繼母逼氏攜子改適氏紡績益勤事姑加謹撫孤守志始終不以貧故有淪現年六十有七

李氏楊士明妻夫亡氏年二十三遺子盛德甫二

歲姑已早亡舅勸氏改嫁氏誓不更適躬親織

紉養舅撫孤現年五十有三

張氏鄭文端妻年十七而寡有遺腹生子啟運撫養成立冰霜自持有古栢舟之操現年六十有

八

劉氏姚士俊妻年二十五而孀遺子淑行甫四歲撫之成立勤儉持家事姑以孝聞現年五十有

八

劉氏張名宗妻年二十五而孀乏子女守貞不嫁爲夫立後孝翁姑聲施閭里現年七十

張氏祖邦直妻年二十五而孀遺孤煥甫九月紡績拾薪以供爨艱苦萬狀不改其操

郭氏胡三視妻夫亡氏年二十有遺腹生子延年甫成立遽歿氏更撫幼孫殿珩比長令就外傳讀書今爲生員氏年七十

陰氏貢士成妻年二十三而寡治家有法教一遺子賦今爲生員氏現年六十三

張氏趙仁妻年十九守節無出夫前妻有遺子氏撫養成立現年六十有司榜其門曰節比松筠
劉氏張行敏妻年二十五守志年七十八而終子成勳妻王氏年二十四而寡現年六十四學官再榜其門

姚氏黃桐妻年二十五而寡撫子黃齡爲生員尋卒婦繼亡更撫幼孫氏年八十知縣謝客榜其門曰淳岸冰操

趙氏王復言妻年二十三守志節同金石治家有法現年六十二學官榜其門

朱氏劉波妻年二十五夫亡有遺腹生子氏事姑以孝撫子以慈現年八十有六

李氏儒生王汝易妻夫亡氏年二十三誓志守節孝養翁姑送終時致哀盡禮遠近敬服現年六

十鄉里公舉節孝有司現在 題請候旌

姑楊氏年踰八旬蔬水承歡孝養不衰現年五十有六

尚氏祖邦名妻年二十五守志遺子太高甫二歲撫孤孝親備嘗艱苦鄉里稱之現年七十有八韓氏安學禮妻年二十五而寡生一子甫六歲矢志靡他節操凜烈事姑母敬順不違現年五十有五

曹氏姚侃妻年二十二守節無子女守貞不嫁事姑及母能和顏愉色先意承志里黨咸以賢孝稱之現年五十一歲

彭氏韓士法妻夫亡氏年十九苦守志節孝養翁姑現年六十有九

史氏張鳳頌妻年二十夫沒無子立侄紹箕爲嗣教以義方箕長爲生員事奉舅姑朝夕恪謹閭里以孝推之現年六十有七

桑氏庠生渠芸妻年二十二夫亡紡績撫孤延師教之今爲生員氏年六十

張氏張輝妻年二十四夫亡父母令改嫁氏矢死立節以養翁姑現年六十有二

朱氏李璿妻年二十二夫亡立侄爲嗣課讀爲生

員現年五十有一

鄧氏生員常克明妻年二十四夫亡撫孤貧艱度日乞食三年有勸其改嫁者氏哭泣不食誓死守志現年六十有七

位氏張宏九妻年二十夫亡極貧無子慮翁姑年老無人奉養誓不改嫁以孝養終現年七十有一女年十五不適人以女紅養母母不得已爲贅夫方一月夫死守節養母撫族侄爲嗣現年四十九母女節孝里黨並重之

蘇氏渠源瀟妻年二十五夫亡無子家貧苦守現

年六十有七

王氏蘇容妻年二十五夫亡守節現年六十

姚氏李炳妻年二十三夫亡無子誓全志節立侄
廷玉爲嗣教督成名現年五十

傅氏監生李世現妻年二十五夫亡撫孤立節現
年六十

王氏宋士奇妻年二十四夫亡矢志守節課子瑄
爲生員有名現年六十有九

蘇氏宋文德妻年二十五夫亡無子立侄爲嗣
養翁姑苦節自持現年七十有一

王氏王亮才妻年二十夫亡苦節清操撫孤課讀
爲生員現年六十有五

齊氏王賢妻年二十夫亡節操自勵現年六十六
歲

杜氏孫光裕妻年二十三夫亡遺一子甘苦食貧
以遂高節現年五十有五

胡氏生員張世傑妻年二十二夫亡無子冰蘖自
持立侄爲後現年五十有五

劉氏張昭之母年二十四夫亡守節現年六十有
四

陳氏李佐清妻年二十夫亡遺子甫三歲以織紉治生粗糲不繼現年五十

李氏韓朝榮妻年二十夫亡有遺腹子保孤守節現年五十有五

渠氏傅賚予妻年二十五夫亡守節五十五年今七十有九

馮氏解文明妻年二十六夫亡守節年七十八而卒

呼氏高田妻年二十六夫歿教養遺孤克有成立

現年六十有八

劉氏高壘妻年二十五夫亡撫孤守節現年五十
有六

王氏高談妻年二十八夫亡遺孤藐弱撫之成立
現年七十

劉氏張林妻年二十二而寡矢死靡他孝養篤摯
孤子亦自樹立現年五十有六

李氏羅錫之妻年二十而寡養翁姑育遺子備極
艱楚夫兄有女幼無依氏懷抱恩養如己出以
慰翁姑之心里黨共以賢孝稱之現年六十有

四

賢婦李氏王端妻端家貧外出三十餘年不歸氏
粗糲自供甘旨奉老不聞怨言課子成立飭躬
以禮現年六十有五

班氏張誘妻年十八守志遺孤甫二歲撫養成就
志行皎潔以禮義自閑現年七十有三

王氏楊崑之妻恩貢王之錫女也年二十守節無
嗣立族侄爲後松筠比操終身不渝現年八十
歲

王氏杜庭階妻年二十二夫故撫孤守節現年五

十有五

閻氏生員李方泰妻年二十五守節現年五十有

四

王氏趙之仁妻年二十三守節事姑舅撫弱子處
族黨御家衆皆有禮法卒能成就家業課子成
名現年七十有二氏好善益篤子成英亦克承
志焉

王氏趙之瑚妻年二十二守節勤儉艱辛言笑不
苟現年五十有一

馬氏張梁妻年二十一守節以女紅佐甘旨甚得
歡心現年六十有八

劉氏張英魁妻年二十四守節事親教子各得其道閨門以內井然有法現年六十有二

高氏彭坦妻年二十二守節德性溫良色養翁姑現年六十有五

邢氏王廷輔妻舉人邢文煥女也年二十守節天性孝慈志行貞潔遺子王紹克謹守家法氏年七十有七精力不衰

楊氏彭之恭妻夫亡氏年二十三守節現年六十有六

吳氏彭鳳騰妻年二十五而寡遺一子守貞不嫁

現年六十有六

李氏劉珊妻年二十二而寡家法嚴肅守志不渝
現年六十有六

張氏朱進訓妻年二十四而寡誓死不嫁現年六
十有六

張氏吳榮妻年二十二夫亡撫養繼子紡績治生
現年六十歲

張氏胡琦妻年二十一孀居守貞不變現年七十
有一

李氏郭文玉妻年二十而寡矢志不二以禮自持

續才集志 卷之十
現年七十有二

李氏張懋敬母敬父亡氏年二十三甘貧守節現年六十有六

張氏張成玉母玉父亡氏年二十五矢志撫孤堅如介石現年五十有四

彭氏侯方興妻年二十守節絕鉛華不事巾櫛至晚歲足不踰戶庭現年六十有二

李氏杜經之妻年二十守志不避艱苦躬織課讀遺子連登今爲生員現年六十有六

李氏王國泰妻年二十二而寡孝親撫孤各盡其

道現年七十

李氏陳致見妻二十四歲夫亡遺子明新教養成
就現年七十有九

李氏种光全妻年二十二夫亡家徒四壁念翁姑
年老誓不改嫁以代夫養遺子振道克有成立
現年七十歲

張氏武生杜鎮西妻年二十一守節立侄永治爲
嗣現年五十有二

魏氏种福臨妻夫亡氏年二十二曲盡孝思堅持
志節現年七十歲

李氏張紹紳妻年二十四守志刻苦自勵現年八

十有一

杜氏貢銓之妻廩生杜人麟女也年二十二守節

事姑及母以孝聞遺子雲龍教之以正族黨以

禮宗稱之現年五十有二

趙氏趙成亮妻年二十三夫亡守志不變現年七

十有三

郭氏生員徐志曾妻年二十四而寡茹苦立節人

無間言現年五十有三

崔氏郝鳴盛妻年十九守志性氣端嚴坐立不倚

現年五十有五

趙氏孫好學妻年十九而寡家貧如洗以針指口
食一子外出了無音問氏守志不變現年六十
有八

張氏王近妻年二十一而寡守志撫孤現年五十
有二

褚氏田福元妻年二十二孀居勵志守節撫子成
立現年六十有八

李氏張正妻年二十三而寡撫子世慕成立氏年
七十有一婦蘇氏年十九世慕歿無子立侄爲

嗣氏隨姑守節克盡孝養現年四十有八

黃氏崔明道妻年二十三而寡養親撫孤身不出
中門現年七十有五

秦氏李之良母年二十四而寡撫孤守節現年七
十有二

司氏張玉然母年二十五夫亡守節現年六十有
六

彭氏孫維端妻年二十五而寡守節四十年現年
六十有五

張氏趙薰妻年二十五夫亡躬率二子勤儉力作

勞苦人不能堪現年七十有二

孫氏孫學純妻年二十四守節撫子成立現年三十有八

張氏李廷芳妻年二十四夫亡孝親撫孤不恤劬勞現年五十有六

劉氏劉直之妻年二十一守志善事翁姑朝夕不怠子生員之煥娶方氏生子永錫歲周而之煥卒方氏亦年二十一克繼姑志堅守苦節事姑教子心力俱竭兩世冰操鄉黨稱之

朱氏劉朴之妻年二十五守節現年七十有四

趙氏鄭守義妻年二十四而寡堅持冰操現年七十八歲

張氏劉之璠母夫亡氏年二十一立節孤帷淡薄自甘現年七十

韓氏劉永亭母年二十五守志現年五十五

杜氏王義秀妻年二十七夫亡守節現年六十四

歲 載州志

劉氏劉繼宗妻年二十三夫故家貧子幼守貞撫

孤備嘗艱苦現年七十有二

李氏英壽秀母年二十四而寡善事舅姑喪葬如

龐華子婦勤儉以成家業現年五十有七

王氏王佐之妻年二十五夫亡以禮自守至老不懈現年六十有五

劉氏王義妻夫亡氏年二十守志撫孤現年六十
吳氏康延年妻年二十四夫亡守志撫孤現年六十有五

張氏韓學之妻年二十四而寡家故貧無以爲養氏以女工佐之撫諸孤教養兼至子文武孫清奇並爲生員現年七十有一

鄭氏張好端妻二十三歲夫亡無子女奉孀姑以

終母黨有勸其改適者涕泣不從熒熒獨居績
紡自給現年五十有四

王氏張佩妻年二十四守志撫孤有成現年五十
有六

王氏趙維寧妻年二十三夫亡遺子在抱誓不他
適極得翁姑歡心躬親勞苦以率子婦現年五
十有八隣里賢之

种氏李成海妻年二十五守節現年六十有六

孫氏李萬方妻年二十五而寡矢志守節現年五
十有一

蕭氏李文起妻年二十二夫亡有遺腹生子撫之
成立現年五十有七

鄭氏趙養基妻年二十二而寡青年矢志兢惕自
持現年五十

常氏童生姚燦妻恩貢常經之女年二十夫亡生
一女方襁褓栢舟自勵矢志靡他有憐其年少
勸改嫁者氏怒終身不與言事姑及母極備小
心隣里以孝推之爲夫立嗣現年四十有九

彭氏郭奉武妻年十八守節家法謹嚴足不踰閭
現年四十有八

孫氏王學宗妻夫亡氏年十九少寡冰兢自持節操益堅現年四十有六

李氏安玉賢妻年二十五而寡守節現年四十有九

孫氏安連之妻年二十四夫亡守節現年四十有八

邢氏彭光普妻夫亡氏年十八矢志持節立子承嗣現年四十有五

張氏鄭瑚之妻夫亡氏年十九無子矢志靡他以

死自誓現年四十有五

鄭氏郭鳳文妻年十九而寡一子方乳家故貧
拮据萬狀獨力支持卒能撫孤成立現年四十
六歲

李氏張珂之妻珂出繼伯父早亡氏年十九守節
無任爲子周旋兩姑之前並得歡心現年四十
有四

周氏張林之妻年二十夫亡堅守志節現年四十
有六

李氏李義方之母年十八而寡甘貧守節勤紡績
操井日以養翁姑鄉黨以賢孝稱之現年四十

有八

鄭氏張行恭妻年二十夫亡堅志守節現年四十
有六

孝婦常氏張璫妻家貧翁病噎思肉食氏自割其
股供奉翁不知也病卒愈鄉里咸稱孝感所致
邑令劉公士玉贈以錢榜其門曰孝行可風

賢婦楊氏樂清縣知縣孫可憲妻秉性淑慎言笑
不苟兼通詩書隨意吐屬詞多雅飭年十四適
孫孫室故貧可憲常授徒於外氏善事舅姑先
意承志自甘粗糲而堂上甘旨無缺至可憲出

寧氏荆布自若無異寒素未幾可憲卒於官宦
况蕭然家無長物氏篤志訓子常以紡績助膏
火克令三子成名皆有學業鄉里嘖嘖稱爲賢
婦年九十餘以壽終知縣張淑璋爲之立傳

賢婦李氏賈青選妻冀州孝廉李調年女也年二
十一而寡哀毀盡禮志以身殉念姑老且病忍
死奉養朝夕問視無倦色已而姑亡氏痛哭失
聲喪葬皆如禮法夫兄洪仁妻李氏先數年而
寡臨終囑氏曰吾有二子俱幼念出一本可善
視之氏撫猶子二人一如已出比長延師教督

冀其有成氏素豐於家樂施與壬午邑大水里人多不舉火氏出粟助之凡資人婚葬修造義渡皆出費不貲今興修書院樂輸銀五十金以充館穀洵閨中淑質也志之以彰其善且表其操

按列女閨中一弱質耳或從容立節代養撫孤或視死如歸致命遂志則女也而士行矣

雍正二年

特建節孝祠屢布

崇節褒嘉貞節其間得焉

凡異者多出士大夫之家至於下里寒微力不足以
自顯遂湮沒而不彰今採訪所至得數十人
深爲惋惜其舊志所載敘次不遺茲志首列
已旌者年例相符身沒而未旌者次之身存
而待旌者又次之至若年例未滿而信其節
可終者亦附載焉誠恐窮簷孤帷旣不能盡
邀

國典而并不列於邑乘此作志者所爲備備也因廣
登十數人於篇末云

衡水縣志卷之十一

事紀志 德音 襪祥 故事

國家有大

詔令霧澤注濺施及下邑兆民賴之載筆者所宜拊
舞以書也衡邑地小而瘠屢被水患

蠲賑之典相望蓋其被澤者深矣至若襪祥可以占
時故事可以鏡古斯考驗所必詳而得失之林
歟志事紀

德音

順治元年

詔蠲明季加派煩征俵馬仍免正糧一半

十一年

詔免六七兩年未完地丁本折錢糧放賑給銀布有差

十三年

詔免八九兩年未完地丁錢糧

康熙六年

詔自順治十六年至十八年未完錢糧悉免之

恩蠲本年租稅十分之三

二十年

詔免十七年以前民欠錢糧

二十四年

詔免正賦三分之一

二十六年

賜復一年其康熙十三年後加增各稅糧並免之

二十七年

詔凡軍民七十以上許一丁侍養免差徭八十以上給
絹一疋綿一斤米一石肉十斤九十倍之

三十一年

特免州縣錢糧有差

四十二年邑水

恩加蠲賑

四十五年

詔自四十一年至四十三年民欠錢糧悉免之已納在

官者抵本年正賦

四十八年

賜老民絹綿米肉八十九十有差

五十二年

詔州縣養老則二十七年例並加存恤

五十六年

特免帶徵地丁錢糧

雍正元年

賜州縣老民婦肉帛有差

三年邑水

恩加蠲賑

七年

特免本年正賦

八年邑水

恩加蠲賑

乾隆元年

賜老民婦七十八九十肉帛有差

二年

賜免本年正賦有差

四年

特免直隸本年額徵錢糧九十萬兩

四年邑水

恩加蠲免

八年邑旱

恩加蠲賑

十六年

賜老民八十以上肉帛有差

二十四年邑水

恩加蠲賑

二十六年邑水

恩加蠲賑

二十七年邑水

恩加蠲賑

二十九年新建老龍亭石闌

特發帑金八千五百五十九兩四錢

三十年重修衡水石橋

特發帑金四萬七千六百八十一兩八錢

三十一年

特免直隸漕糧

三十一年改修磚城

特發帑金六萬三千四百九十餘兩建造

禮祥

唐

大歷十年秋九月月暈畢昴中有黑氣乍合乍散

占曰趙地連兵時田承嗣既叛李寶臣遂與通

謀至其子惟岳勒兵拒命而恒定深趙世為強

鎮

宋

嘉定八年九月紅襖賊周元兒作亂攻陷金之深州安平無極等縣真定師以計破之殺元兒併殺其黨五百餘人時書嘉定年號者從宋紀也係深于金者以深時屬於金故也

九年秋七月金詔義軍節度使畢蘭阿魯帶復威州及獲鹿縣遂復深州

明

永樂五年夏六月大水壞城湮没人畜不可勝計十三年淫雨河溢大水壞城及官民廬舍不可居

遂遷城

成化十四年大水

十八年大水圯城舟楫人縣治官民房屋傾頽殆
盡食惟魚鼈

宏治元年夏大旱

七年大疫民死甚衆

十年大旱

十八年九月十三日地震

正德四年夏四月風霾晝晦

五年夏五月地震大旱秋七月大水傷稼

六年流賊劉六等肆行寇掠秋七月大水傷稼黑

青大作

八年夏五月十三日地震六月蝗

九年大旱

十一年自正月不雨至六月初一日方雨是年大有

十二年夏四月大水泮禾稼廬舍湮沒

嘉靖三年春三月十二日大風晝晦如夜至晚方息

九年大水陸地行舟

十二年大旱

十五年蝗蝻生知縣郝銘令民捕之納倉給穀日
得數十石遂不爲災

十七年大水民多流移

二十四年大旱

二十九年大旱

三十年春旱民大饑開倉賑給至五月終方雨七
月初二日大雨晝夜不止壞城垣民居

三十二年大水陸地行舟斗粟價至二錢

三十四年地震

三十九年大旱斗米銀二錢邑人皆拆房屋鬻男女易食轉徙河南山東就食道路不絕

隆慶三年閏六月大水石橋頽圯邑人徐賈趙重修之

萬歷十年大疫死亡無數

十九年夏六月蝗蝻生隣境蔽野盈尺米價翔貴知縣周子文設法捕之令民納倉給穀日得數石是歲賴以不災

二十年久雨田苗盡沒知縣周子文親歷鄉村相度形勢以潯沱水爲害乃自張官鋪增築隄障

以殺其泛濫之勢又濬周通村水入於大河以順其下流之常禾麥穗秀是歲有年

三十五年水

四十二年水

天啟六年大水

七年大水

崇正十一年秋九月十四日四鼓城隍廟鐘自鳴
合邑驚異是年冬兵臨城下

十一年十月初七日電雷大作雨雹

十三年大旱人食梨核棗核樹皮草子四境多殍

十四年大旱斗米千文民大困插標自鬻人莫之顧炊骨啖肉以死爲隣

十五年春三月初三日晚自城東北至城西南火光共九處夜明如月又忽似營伍燈籠數百一字飛來直逼東南城角樓上用礮擊之火光遂不動擊之三乃回東南人傳爲妖火

十五年閏十一月十九日北鄉居民南視縣城黑氣密罩其上空中赤色圓大如斗又上似披髮時大兵是日入城兵始來直薄仁育門內發礮擊之不能退蟻附而上王洪運以世襲委任練

復方縣志 卷之十一
總督戰城頭勢不支衆潰俱死城乃陷代庖者
棗強縣丞陶爾秉是日赴衙內周公泉死水淺
弗克兵去曳出之猶生縣典史宋禮先毀服去
城內居民乘亂大肆劫掠慘死者多

十六年夏四月十四日晚淫氣獨現于城內一赤
一綠相間自南城樓起遶鼓樓至東城樓止

十六年橋南街劉牙行家猪產怪象鼻人眼皮紅
白如初育小兒微帶白毛

十六年冬十月初七至初九連日晚城之內外街
巷遍地黑臭氣高不過屋簷至八蜡廟前氣愈

甚人相見不覩其面

十七年春二月十八日陰霾黑風起自城西北向
東南白晝如晦秉燭無光

十七年夏五月初九日土寇陷城大盜吳雙堂等
擁衆數千劫城市民房官衙東西城樓焚燬無
存士民俱逃至棗強縣地方潛居徧地烽起人
有甘心爲盜者有掛名迫脅苟免身家者四十
餘日不敢入城羣盜發掘劫殺亦四十餘日

國朝

順治二年水

五年春雨數旬不止夏有蝗自西南來遮日蔽空
亦不爲災秋七月水滹沱河自晉州南徙由賈
家口直入漳河

九年滹沱與漳水並發民田漂沒米價騰貴

十年大水斗米錢二千七百文百姓離徙知縣任
宏孝捐俸煮粥以贍饑饉民不爲盜

十一年夏四月

上憫念民艱發帑金數萬兩遣京堂大臣詣縣放賑賜
銀布有差五月淫雨經旬河水橫溢二麥方熟
皆糜爛於塲隴至七月邑城不沒者數版食惟

魚鰕關廂村落漂沒過半初三日河伯震怒侵薄邑城忽於迎旭門北隅突出湧泉水噴丈餘圍城性命危在頃刻士民哀叫力塞不止知縣任宏孝拜跪水中垂泣祈祝願輸俸金四十修葺神祠移時城土崩下直堵水口城外波濤頓落尺餘

十二年二麥有收夏不雨知縣任宏孝率屬虔禱寢處壇側旣而滂沱沾足秋七月蝗自東來輔由北至縣治東南尤甚官民祭禱漸次南遷是年秋稼歉收斗米錢二千文冬大雪

十三年元旦將午有黑氣自西北來如烟如霧日
爲之昏移時復霽

康熙十七年冬十二月二十二日申時空中有聲

自西南如連珠礮響至東南移時始息

十八年秋七月二十八日巳時地震

二十年歲大熟斗米錢三十文

二十九年大有菽粟狼籍牲畜甚貴

三十六年歲稔

四十二年大水饑詳請蠲賑

四十三年瓜菓豐稔

六十一年冬十一月霜霧迷茫樹草成冰旬餘日
雍正三年水河決東南兩岸詳請蠲賑

四年五月十八日雨雹如拳大者如瓜自治北迤
東南袤二十餘里廣十里許傷麥人畜死者甚
衆

六年大有

八年秋八月水三岸盡決詳請蠲賑

十年大水河決兩岸詳請蠲賑

乾隆三年秋七月水河決東南兩岸詳請蠲賑

四年秋水傷禾詳請蠲賑

八年夏六月無雨熱甚人多暍死勘成旱災詳請
蠲賑

二十四年夏旱秋七月水河決四岸廬舍頽壞米
價騰貴詳請蠲賑

二十五年麥秀有二三岐者

二十五年春三月二十六日戌刻星隕大如箕赤
色自西北而東南尾後十數小星隨之戛然有
聲光彩射人

二十六年秋七月河水泛漲堤決四岸尋復大雨
城不沒者數版斗米七百餘文民饑詳請蠲賑

二十六年四月東庄村王喜明妻李氏一產三男
現在存活知縣何燧詳報 恩給布米銀十兩
二十七年閏五月霪雨浹旬麥登場多糜爛秋禾
淹沒民乏食詳請蠲賑

二十八年大有

二十九年有秋

三十年大有

三十一年麥熟

故事

漢

後水縣志 卷之十一
更始元年王郎稱帝徇下冀州

二年光武徇河北自下博赴信都發兵擊王郎

初平元年董卓舉韓馥爲冀州牧

二年袁紹自領冀州牧

建安九年曹操破冀州

魏

黃初元年徙冀州士卒十萬戶實河南

晉

元康三年填星歲星太白三星聚於畢昴

大元十年夏太白晝見於畢昴占曰趙地有兵時

符堅大衆奔潰趙魏連兵相攻

唐

高祖武德二年冬羅藝破夏兵于衡水賜姓李氏
五年冬十月唐睢陽王道元及劉黑闥戰于下博
敗沒

開元二十年詔以深趙恒定冀五州隸河北采訪
處置使

天寶十四年春二月熒惑太白闕于畢昴占曰趙
地有兵時祿山專制三道陰蓄異志未幾楊國
忠以事激之祿山遂反而趙地爲戰場

廣德元年以深趙恒定四州隸成德軍節度

大歷十四年春正月詔復深趙恒定冀五州三年
吏民爲李惟岳迫脅者赦之

元和十三年冬十月成德軍觀察使王承元以深
趙鎮冀四州歸於有司

十五年十一月赦深趙鎮冀四州死罪以下賜成
德軍將士錢

興元元年以王武俊爲冀恒深趙節度使

長慶元年八月詔諸道兵討王庭湊以牛元翼爲
深翼節度使庭寇深州

二年二月王庭湊圍牛元翼於深州官軍三面救之皆以乏糧不能進雖李光顏亦閉壁自守朝廷不得已以庭湊爲成德節度使而遣韓愈宣慰其軍詔愈至境更觀事勢勿遽入愈曰止君之仁死臣之義遂往至鎮庭湊拔刀弦弓以逆之及館甲士羅於庭庭湊言曰所以紛紛者乃此曹所爲非庭湊心愈厲聲曰天子以尚書有將帥材故賜之節鉞不知尚書乃不能與健兒語耶甲士前曰先太師爲國擊走朱滔血衣猶在此軍何負朝廷乃以爲賊乎愈曰汝曹尚能

御覽卷之十一
記先太師則善矣夫逆順之爲禍福豈遠耶白
安史叛逆以來至元濟師道其子孫有今尚存
者乎田令公以魏博歸朝廷子孫孩提皆爲美
官王承元以此軍歸朝廷弱冠建節劉悟李祐
皆爲節度使汝曹亦聞之乎庭湊恐衆心動磨
之使出謂愈曰侍郎來欲何爲曰神策諸將如
牛元翼者不少但朝廷顧大體不可棄之耳尚
書何爲圍之不置庭湊曰卽當出之因與愈宴
禮而歸之未幾元翼將十騎突圍出深州

出帝開運元年春三月冀州刺史白從暉及契丹
戰於衡水敗之

宋

神宗元豐七年秋河決棗強縣水官議於深冀衡
水之間築隄障三百六十里期一月就工河北
都轉運陳薦請以歲月爲之

雍熙三年秋八月岐溝敗北契丹乘勝長驅而南
遂陷深州掠官吏俘士民而去

靖康元年十二月帝至自金營議割兩河南康錄
事歐陽珣上書極言祖宗之地尺寸不可以與

人復抗論當與力戰戰敗而失地他日取之直
不戰而割地他日取之曲時宰怒欲殺珣乃以
珣爲匠作監奉使割河朔地曾深州固守不下
金人以珣至城下俾致朝命珣慟哭謂城上人
曰朝廷爲奸臣所誤至此吾已辦死來矣汝等
宜勉爲忠義報國金人怒執送燕焚死之

通鑑

程昉興修水利河決大名昉議塞之因疏塘水溉

深州

明

洪武九年移衡水海盈鹽場於鹽山縣之蘇棘場

千馬侯店二社仍充竈戶

三十五年正月朱能率輕騎一千哨至衡水縣遇敵與戰大敗之生擒指揮賈榮

正德十四年秋武宗南征九月九日過本縣時微雨帝戎衣乘騎與朱寧江彬聯轡行晚至河上中官數人奉帝乘舟舉網而漁得鯉數尾進城幸邑紳蘇縉宅內宿焉次日午駕發棗強而南天啟二年秋七月二十九日武邑縣白家屯白蓮教作亂賊首于宏志煽惑衛民脅從者多至八月初五日官兵張體乾等到遂滅之

卷之十一
崇正十六年春三月初大兵北歸初六日飯冀州
次日至衡水以殘破之餘未發一食而過鉅鹿
焦罔等村

十七年三月十二日闖兵權將軍劉宗敏兵萬餘由
南宮冀州過衡水北行

國朝

順治元年秋八月固山拔班石某率騎數千安集
地方深州判官朱綬率紳衿郊迎後遂委署縣
事請鑄印給之兵火之後民不暇耕皆掃草子
爲食

六年秋七月初八日隣寇猖獗五鼓時有馬賊百餘步賊千餘屯聚隍外城上矢石如雨賊知有備遁去